

四庫全書

集部

欽定四庫全書

松桂堂全集卷三十九

吏部侍郎彭孫遹撰

延露詞二

小令

少年遊

席上有贈

花底新聲尊前舊侶一醉盡生平司馬無家文鵲未嫁

贏得是虛名 當時顧曲朱樓上
烟月十年更老我青袍
誤人紅粉相對不勝情

思越人

題余氏女子繡西子浣紗圖同程村阮亭作
擘仙絲寫美艷依然南國娉婷石畔浣紗今在否
溪流猶為人清興亡吳越眉顰上鷗夷枉鑄遺像日暮百
花洲下路珊珊步屧餘響

醉花陰

和漱玉詞同阮亭作

花影枝枝搖午晝
桂炷銷獅獸
愁病怯登高
幾陣西風吹得羅裳透
闌干星月三更後
玉露沾香袖
心事寄誰行
約畧腰身轉
覺秋來瘦

怨王孫

春暮和李易安同阮亭

春陰晚晚薔薇庭院謝
女樓空秦娥夢斷
倩柳色把情傳
結纏綿
當初小喜將人惹
還拋捨
煞是無賴也
別

來又過寒食幾樹橫斜斷腸花

古詩小喜多唐突相憐能幾時

又

銀箭聲悄金屏思惱香夢和雲流鶯弄曉一樹樹海棠
紅不禁風風狂雨驟傷心處花落去穠豔空辜負登
樓一望天際目盡南雲鎮思君

雙調望江南

初見

初見處記得在東臯曾與酒人司白墮便從仙籍識青

腰顏色為誰嬌
行酒罷滅燭更相邀
並體花間剛恰
好凌波一捻已魂銷
何況是今宵

浪淘沙

戲贈閨人

生計漫匆匆賣賦臨邛
黃金先為貰新豐
伊唱吳趨儂起舞
激楚迴風
此處不留儂甚處留儂
小朱慵粉若為容
一事與卿權領取
酒誥花封

代答

曉起弄妝慵笑指吳儂白衣夫婿白頭儂今日海棠花
下飲端與誰同雲雨楚天重誰繫郎蹤任伊夢遍十
三峯解識近來勤入道懶向花叢

懷歸

漏永夜如年撥盡鑪煙乍晴又雨晚秋天切切暗牕
外語欲斷還連寒色透重綿若個周旋自家將息自
家憐何日歸來相訴也月下星前

客牕夜雨

寒雨太連綿一抹江天廣陵鐘斷夜無眠何事秋聲吹
不了長打窗前酒後轉淒然著處堪憐故鄉只在睡
鄉邊好囑夢兒歸去也片刻團圓

杏花天

美人題紅葉

安排秀句描秋思正沉吟湘毫欲試風前紅葉輕於紙
薄命生憎似此堪惆悵美人獨自碧雲杳佳期未至
有情盡解相思死消得銀鈎幾字

摘紅英

客中聞賣花聲

東風緊吹芳信賣花聲隔牆頭粉耽人恨教人困賒得
春光為誰簪髻青兒嫩紅兒褪夢迴蝴蝶難重認情
兒悶心兒忖別來幾日玫瑰開盡

紅窗睡

舟泊廬山下寄吳爾世

薄暮江濱曉竹尋烟見水面漁燈三兩香鑪五老青冥

上正峯峯相向 猶記此中君獨往
料此後雲巖松瀑 依依夢想因風傳
語道廬山無恙

河傳

和溫飛卿

愁緒如許對清宵
砌竹風敲蕭蕭一聲兩聲魂欲銷
無聊冬缸凝玉膏
却抱雲和傳素怨芳信晚腸併危絃
斷夜烏啼竹葉飛
淒其小窗月又西

鷓鴣天

戲題閨人團扇

蘭吹和煙細不聞紅蕤夢冷浸香雲大垂手處千金意
小比肩時兩玉人珠有暈璧無痕怎生消得許多春
願將巫女峯頭水形影團來併一身

偶贈

上社橋頭鬪綵韉黃鸝巷口按歌年當筵錄酒從無誤
隔坐拋鉤絕可憐良宴會好因緣玉兒顏色雪兒絃
別來多少傷心句寫付吳中水碧箋

咏美人眉

麝月纔分一寸彎，長顰短暈淺深間。
療飢自有餐來色，消渴因看遠際山。
螺子細，柳絲寒，兩峯天外碧相攢。
翠蛾一滴能傳語，窈住春愁不放還。

咏美人指甲

知向窗中弄彩毫，墨痕隱隱沁紅么。
手揮玉柱頻教剪，指撥沉煙旋欲焦。
風力折嫩蘭苔，夜來輕蘸碧雲鰲。
芳心要使檀奴覺，一指春肌暈未消。

玉樓春

五日飲虎邱山下題壁

越衣當暑清風至芒鞋偶過雲嵒寺
虎邱山下故人家
能倒金樽留我醉
醉後難平多少事
仰天欲問天何
意偏使鷄鳴狗盜生
却令賦客騷人死

贈河內賈雲谷

三河自昔繁華地
君最風流堪自喜
莫向天涯作旅愁
人生大約如萍寄
曲江當日曾連轡
盛年畧與荀郎

似今朝試向鏡中看不覺已年三十四

白樂天詩不覺明鏡中忽年三

四十

三月晦日歸舟

淡烟斜日長亭暮
難得韶光容易度
江南無限斷腸花
枝上東風枝下雨
萋萋芳草傷心路
一片雲帆天外
渡人從春色去
邊來舟向夢魂來處去

步蟾宮

書姬人素領巾

一泓香雪團金釧卸仙銖輕盈如剪分明只是洛川人
送微波靈綃乍捲 人間天上誰曾見生受了玉柔花
軟情知薄福為伊消拚不做黑頭王掾

雨中花

解嘲

麴生已拜尚書尹毛生又攝中書品橘叟千頭竹君千
戶盡領通侯印 羽客乘軒花錫衮先生豈合長棲遁
官柳排衙官蛙疊鼓官補南柯郡

羅虬有
花九錫

夜行船

花底私語

半舸駕綃輕蘸碧軟春纖湘紈無力圓靨初分橫波欲
瀉心事有誰知得解意芳姿偏作劇故意兒弄人羞
澀笑指蓮花向儂偷問可似粉郎顏色

虞美人

詠虞美人花

香魂帳底隨煙冷判與春風領柔枝留得可憐名一捻

紅衣猶似儂人輕 嬌歌小按傷心拍
楚楚綃裳濕玉環飛燕已成塵
不道虞兮原是此花身

偶賦

小樓昨夜霜華凝膏薄
蘭心冷紅烟幾縷暗香濃
可惜一場歡會太匆匆
今朝行到紗牕下
剛值梳頭罷回眸
一笑轉嫣然恰似三生石畔舊因緣

閨情

連枝蘭燭熒熒影簾外
秋風冷神絲繡褥鬱金香
不覺

犀梳低墮枕函傍
纖纖玉指如萌削
數遍陽臺約脂
殷粉弱最傷情偏是行雲夢好易為醒

燈下

繞廊試覓芳蹤去
數點蘋花雨九微燈下見渠儂
恰是巫山神女夢中逢
月稜隱約唇朱小簇蝶湘裙裊玉
簫吹徹獸烟溫
記得橫波不轉暗窺人

登太白酒樓和董蒼水韻

青蒼齊魯垂垂小
十二山河遶銜盃
笑殺世人忙不道

次公當日醒而狂 騎鯨客去烟波暝碧落無音信振
衣一上謫仙樓遙望長安不見使人愁

南鄉子 第三體

採蘭

微雨過池塘玉骨纔勝翠莞涼乍起猶然閒徙倚紗牕
一葉紅蕖墜筆牀 楚畹媚幽芳小摘蘭叢助曉粧半
晌沉吟緣底事思量有箇人兒竟體香

鵲橋仙

清明

煙蕪瀉浪晴川鋪練一陣風來吹皺韶光百五禁烟時
又過了幾番花候天桃染暈垂楊拖線萬點春光泄
漏口噙紅豆寄多情為誰把相思嘗透

紅豆名
相思子

踏莎行

悼兄女

四韻拈成六書摹遍小窗夜夜溫文選繡牀竟日不聞
聲間來學弄湘妃管白壁難堅彩雲易斷此生何處

重相見鑒江一紙斷腸書淚痕遙洒登高宴

春暮

鶯擲金梭柳拋翠縷盈盈嬌眼慵難舉落花一夜嫁東風
無情蜂蝶輕相許尺五樓臺秋千笑語青鞵濕透
胭脂雨流波千里送春歸棠梨開盡愁無主

題美人畫扇

點點凌波些些眉嫵玉蓮花下私行去花光臉色不分
明紅酥欲凝嬌無語醉玉如煙汗粧如雨風流體態

還如許羅衣恰好半身長依稀已到銷魂處

將遊嶺南却寄

荔子香寒珠官色冷綠溪雨暗枕榔影枉將淚眼望南
雲夢魂不渡梅花嶺翠羽雙飛素馨千頃此方仍是
繁華境仙梅開日是來時一枝歸把相思贈

虞美人 第二體

錫山舟中獨酌

玉卮如雪溶溶白卮酒還同色水雲影裏叩船舷無情

月也解相憐為人圓
壚頭肯典鸛裘否歸取文君酒
碧桃花下醉摩娑秦箏趙瑟倚聲歌樂誰多

小重山

扶病

遲日園亭禊事收那時扶病送上蘭舟千絲萬緒在心
頭方寸地著得許多愁
風雨幾曾休怪來人意冷似
新秋晚天莫倚最高樓樓下水一曲斷腸流

中調

臨江仙

遣信

青瑣餘烟猶在握幾年香冷巾幘此生為客幾時休殷
勤江上鯉清淚濕書郵欲向鏡中扶柳髻髻絲知為
誰秋春陰漠漠鎖層樓斜陽如弱水只管向西流

聽雨

倚枕清宵愁不寐紙窗亂撲春蟲尖寒偏易掠輕容空
堂羣響寂人在雨聲中五夜蓮籌頻下盡料應花睡

方濃可憐零落綺香叢蜀魂悽欲斷相對泣殘紅

姑蘇懷古

千載霸圖銷歇也西風廢苑長洲吳東門外一江秋
將亡國恨不盡古今流臺上鷓鴣臺下鹿興亡轉盼
都休烟波空羨五湖遊青山和綠水遷換幾漁舟

聞聲

鞦袖無言檀注小窓前曾見微行隔牕聞喚侍兒名風
飄鶯語脆故是向人聲兩字輕綃和小玉千嬌百媚

橫生吹來氣作楚蘭馨
今生有分麼消受一聲卿

唐多令

人日雪中立春

玉砌爛仙葩
朱拱渲紫霞
小梅幾點逗簷牙
綵勝銀旂
齊插鬢沒多個一些些
繡帖熨牕紗
窗中金縷花東
風力軟
半天斜吹起
一庭香雪舞
春先到謝娘家

蝶戀花

寒夜閨情

珠漏頻催冬夜永寒月窺人人在清虛境十二屏山湘
水淨香蕤枕畔紅冰凝 累穀紫茸風約定半晌無聲
似睡依然醒壁上餘燈金燼冷帳紋細裊沉烟影紫茸
帳名
雲間別蒼水

黃鳥間關啼不住斷送殘春陣陣桐花雨幾日西牕深
夜語微吟每到銷魂處 圓渌潮生西日暮三老長年
抵死催人去執手高樓輕別取錦牋空贈相思句

又疊前韻

世事關心難得住北渚停橈一夜孤蓬雨不見美人誰
與語空江月落潮平處黯黯碧雲天薄暮酒冷香殘
無計驅愁去他日重來還看取玉兒新製驚人句

玉兒
蒼水

詩集
名

一剪梅

答貽上餉酒

路近槐安且薄遊朱邸封侯綵仗鳴騶南柯五馬最風
流莫問隋樓只問秦樓三十無官欲白頭天上消愁

地下埋憂半生知己兩人休從事青州司理揚州

和漱玉詞同阮亭作

萬疊青山一抹秋天半歸雲天外歸舟何時玉席手重
攜同拂香巾同上朱樓南浦寒潮帶雨流只送人行

不管人愁吳天極目路逶迤海湧峰頭薛濺湖頭

古詩香巾

拂玉席共郎登樓寢
虎邱山一名海湧峯

攤破醜奴兒

閨怨

秦樓誰管三生約花下行春月下行雲鸞鏡從生蛛網
塵也囉難道是一心人 為伊禁得多煩惱收拾羅裙
打疊羅巾一捻香酥滿淚痕也囉難道是不思君

定風波

晚坐

風墮涼螢夜色微玉池蓮葉碧痕齊行到曲廊將盡際
難避意錢人在小窗西 似水天階閑坐遍試看三星
猶自為人低一種御香通氣處何許暗中不道換羅衣

意錢即攤錢
也見梁冀傳

漁家傲

梁谿道中

遠樹生煙漠漠起九龍峯色青于髻素字誰傳江上鯉
歸也未山川一片悲秋氣三尺蒲帆風力細儂家遠
在吳江尾一種相思千樣味心兒裏秋茶只覺甘如薺

春夜

窈窕紅雲明畫閣綉簾不動金鈴索欲雨春繁花自落

東風惡峭寒今夕誰先覺
忽憶前歡還似昨無言倚
遍明霞幄新燕輕盈垂柳
弱人如削玄霜夜搗長生藥
寫恨

春雨春風褰翠箔楊花也似人輕薄
魚子花牋山海約
當初錯當初錯畫鴛鴦諾
十幅紅裙金縷雀近緣修
道渾閑却手把琅函書一握
從今莫從今莫更思量著
蘇幕遮

婁江寄家信作

柳花風榆莢雨檢點春光去也何匆遽紅淚飄零千萬
樹亂鶯啼到無聲處 旅顏殘歸計誤日日尋思臨別
叮嚀語欲倩文鱗傳尺素婁水無情不肯西流去

第六
句少

字二

醉春風

私調

半妥偏荷髻小立朱扉裏妙齡取次問伊行幾幾綠
似珠鮮碧同玉豔一般年紀 香臂紅粧膩秀黛青烟

細不知曾否破瓜無未未今夜羅幃月明人靜怕難迴避

私會

驀地相逢乍三五團圓夜幾回解帶又沉吟怕怕怕衣上香濃口邊朱損有人驚詫好把紅茵藉更取青鬟卸為伊相詛不能休罷罷索性迴身恣他憐惜柳嬌花姹

風中柳

立春日平原道上作

芳甸青旗山縣迎春時候無端獨向風塵走去年今日
酒重沾衣袖簾幙捲花封如繡迢遞家園景色還應
依舊高樓不展橫雲皺重門深掩鵲腦歎金獸怕春來
更添消瘦

十眉圖有
橫雲眉

離別

槐樹陰濃小院晚涼時節別離可奈腸如結歌喉輕轉
聽唱陽關徹情脉脉幾回嗚咽細語叮嚀道且自消

停這歇燈火高城更未絕殘粧重整送向門前別拚今

宵為伊啼血

道字
襯

行香子

賦恨

取次相親打疊消魂再休避小勝魚鱗箇時心事費盡
溫存有幾分憐幾分愛幾分嗔參橫斗轉匆匆歸去
木蒼琅隔斷重津分明眼底欲見何因似鏡中花水中
月夢中雲

小院殘春

小院殘春金鎖重門花陰裏
隔子迴紋彈琴清夜待月
黃昏想那時情那時事那時人
三年一瞬兩情千里
似蓬科飄泊江村淒涼玉柱慘淡金樽看燈如雨雨如
夢夢如塵

青玉案

九日

寒烟衰柳西陵路是一幅悲秋賦
凝望衡臯天欲暮蕭

風吟葉濕雲粘樹不見登高處
東籬把酒黃花吐應
插遍茱萸無數美景良辰誰與度
露蛩聲咽霜砧響斷
枕上瀟瀟雨

感皇恩

題北隱山房

深戶映花關紙牕茅屋栽就瀟湘萬竿竹
捎雲拂日染
出一庭濃綠石牀欹枕處茶初熟
中有高人棲遲空
谷冰雪滌洄絕塵俗
欲遺襍佩采采露蘭霜菊相思何

處也人如玉

小桃紅

題悔菴桃花源樂府

好把荷衣製歸隱從茲始煙外迷津雲中問渡桃花春
水想武陵當日避秦人五柳前身是一曲紅牙試千
載還神似玉骨蟬輕仙踪羽化碧霄高逝想世間不屑
折腰人今古皆如此

千秋歲

題素重其侍母圖

金盤玉七斟酌西池醴傳妙舞流仙吹斑衣娛此日霜
哺思前事北堂上粲然一笑慈顏喜 見說麒麟瑞巧
向懷中墜應解識之無字添枝桐月閨入夢蘭雲細願
歲歲青春白髮看兒戲

傳言玉女

題余氏女子繡柳毅傳書圖同程村阮亭文
友分賦

霧鬢風鬟憔悴洞庭秋葉湘雲淚滿點點鮫人血緘愁
欲寄去雁遠衝江雪兒家何處綃宮璇闕 涇水歸來
依舊珠輝玉潔此情難負更把紅絲結昔人已往如聽
當年嗚咽素書一紙銀針千疊

祝英臺近

重陽後一日揚州別程村阮亭

遠峰青寒渚碧零落紅衣暮流雪迴風陣陣蘆花舞秋
光欲斷人腸重陽過也猶做作滿城風雨 太匆遽乍

可一曲驪歌便上蘭舟去水雲無際何處尋前渡依稀
認得歸程黃葉清江是昨夜夢中來路

蕙蘭芳引

答梅菴餉酒茗

不斷鄉愁烟水外風帆如簇恨芳草斜陽迢遞偏傷遠
目扶筇歸去正東隣酒香茶熟乍飛箋來到空館敲殘
寒玉綠蟻頻浮翠旗纔展頓消煩燠有紫鱸千頭更
汲取碧琳千斛石爐徐沸葛巾新漉倚南牕一枕清眠

初足

更字觀

驀山溪

舟中殘月

芙蓉湖畔點點喧
津鼓何處是歸程
輕鷗外一聲柔櫓
香銷酒薄早是不成眠
怪好月故相撩枕畔
時來去
方暉圓景搖曳紛
無數風勒水聲寒
又激起吳歎淒楚
夜長夢短此意有誰知
算只有廣寒人知我傷心處

洞仙歌

元夕

千門萬戶聽踏歌聲遍一派笙簫暗塵遠有麝蘭通氣
羅綺如雲香過處隱隱紅簾盡捲閑行南北曲玉醉
花媽爭簇天街閨娥轉更誰家豔質燈火闌干驀地裏
夜深重見向皓月光中費疑猜不道是今宵廣寒人現
法曲獻仙音

九日揚州寓舍得錢大幼日秋試捷音作此
却寄

黃入宮槐香分月桂仙宴鹿鳴初舉江上峯青曲中人
遠傳遍湘靈佳句錦箋遙芳信速早到竹西路登高處
憶當日篝燈深語西牕下樽酒論文幾度綵筆掣青
霜不加點賦成鸚鵡共說錢郎好添修龍樓鳳宇問少
年同學若個才情如許

松桂堂全集卷三十九

欽定四庫全書

松桂堂全集卷四十

吏部侍郎彭孫遹撰

延露詞三

長調

滿江紅

和悔菴生日自題小影韻

解組歸來便黃綺欣然相許休重問屈生詹尹賈生季

主酒後擘箋霏艷雪花間量屐粘香雨待穀巾葛帔老
溪山招尋處 絳灌在堪誰與義皇遠還空佇向歌樓

乞食講筵高踞右北平中埋羽箭吳東門下沉簫鼓但

短衣匹馬盡餘年無他語

悔菴曾官永平古右北平地卜居薳溪即吳東門也

誰傳先生須記取門前五柳問何人素心晨夕村童隣

叟世上滄桑纔轉瞬夢中金紫難迴首看當時花月滿

姑胥今存否 也不羨柔荑手也不慕櫻桃口只蕭然

偕隱鴻妻萊婦松節且揮高士塵竹林試醉賢人酒任

黃金斗印綰通侯功人狗

華遜來與予同甲以端午前一日生因有此

贈

不飲何為把一切窮愁盡掃看門外花明草煖天中時
到繡虎銀符都插遍那堪令節成吾老喚紅巾翠袖為
君歌聲繚繞 人世事堪成笑餘子輩寧須道儘東塗
西抹誇他年少擬作山中同甲會天涯知己樽前少向
南隣呼取洛陽生同傾倒

洛陽生謂河內賈子雲谷亦辛未生也時同客吳下

五日觀競渡

且往觀乎閭門外今朝水戲見兩兩靈絲艾虎釵頭紛
綴舊俗吳中猶未改習流人鬪魚龍技看綵雲一派鎖
清濠波如沸流覽罷心猶悸憑弔處情難已向風前
醺酒何妨沉醉千古三閭同一哭江潭不少人憔悴待
為書重續賈長沙投湘水

綵雲港在閭門外見姑蘇志

惜秋華

秋怨

纔入新秋早。麝燈慵開。鶯簧倦矣。孤影誰憐。銀缸幾度
羞剔烏絲小字。看看淡好似賺人魚墨。愁寂水晶簾捲。
見舊時月色。枉自尋消息。恨餘香斷。素偏有無窮憶。
誰把病容扶起。紛紜朱碧。便將萬斛滄波移來。比似鮫
珠滴。終夕也只得兩番潮汐。

烏賊魚吐汁如淡墨。南人取以作書。逾年但存空紙。

鳳凰臺上憶吹簫

和漱玉詞同阮亭作

寶鴨拋煙寒。蟹泣露蘭橈。催發湖頭正。銀河清淺殘月。

如鈎多少情
悰欲說知無奈
則索行休
紗窗靜幾株
疎柳一片清秋
堪憂箇人何處
那衣香手粉
髻鬢還留
憶舊年此夜
花壓層樓
靜對金波
似水桃笙
上隱隱
回眸傷心處
依然花月
添却離愁

閏七夕咏牛女

曉露招涼秋
梧益葉雙星
低映清宵
想天潢再駕
綺節重邀
翠鵲仙翎
未滿又河邊
催喚填橋
迎車罷虹
川波委月幕
香飄迢迢
靈辰相望
早一年雨度
邂逅雲霄

笑孤明寶婺獨處珠匏休問故人機素怕龍梭一月長
拋願從此金章玉節只閨今朝

婺女星在織女南匏瓜星在河鼓東離珠北俱

見天官書

水調歌頭

次韻答家兄仲謀

去年分手處蕭寺古鐘樓縹緲霜天孤雁驚破一行秋
二十四橋烟月一百五朝風雨憔悴少年遊故鄉渺無
際目斷不勝愁吳天角楚江尾越山頭不如從此歸

去揮手弄魚鉤縱有長安同學誰問行吟澤畔五月有
披裘湖山春未老去去莫淹留

滿庭芳

晚景和少游韻

飲水虹明蒸山霞爛亂帆爭渡津門離人向夕無緒對
芳樽幾上層樓極目疎林外落照繽紛空凝望天邊白
苧烟雨鎖空村 羈魂飛欲去清江千里南北中分悵
瑤琴徒在錦瑟空存腸斷蕭娘一紙羅巾賸萬點檀痕

憑傳語玉兒憔悴終不負東昏

鵝李有白芻村烟
雨樓是吾鄉也

倦尋芳

感舊

追思往日月皎燈寒梅魂清凍客散金堂花漏一聲頻
送絳雪沾衣香夢熟綠雲堆枕春愁重迴身處似珠鮮
玉脆盈盈入捧更消受吳綾弄墨越簾迎涼時時相
共自去江干信斷魚牋誰貢聞洗鉛芳新學道禹餘琳
札都成誦待重尋早招取上清鸞鳳

三清一名禹餘

八聲甘州

秋怨和柳七韻

點清霜一夜渡河來木葉疎高秋最傷心時候西風旅
夢殘月江樓何事南來北往行役不知休回首當年事
颼散雲流 可惜舞茵歌管任蛛絲馬跡狼藉誰收便
吳姬楚艷值得幾回留憶分襟木蘭花下悵佳期怯上
此花舟料伊也懨懨終日長為儂愁

珍珠簾

密約

湘紋幾摺闌干疊十二碧城宮闕一縷紫猊煙片影紅
窗月小語相期全不覺怕姓氏飛瓊輕洩周折待粘雲
染雨臨行還怯猛把心兒拚却今宵休孤負良辰佳
節蘭液冷香犀草露沾金蝶無賴杜鵑枝上鳥向窗外
聲聲啼血饒舌纔勸得人歸又催離別

杜鵑初鳴時聞
之主使人離別

見酉陽
雜俎

三姝媚

旅夢

花宮清磬杳聽城頭一派角聲悲繞晚來清味只秋窗
無火暗螢相照解帶將眠剛月色瞳朧來到千里江關
十年心事相思多少恍在舊家庭館見朱幌微垂綠
窗初曉驚伊消瘦把別時蹤跡向儂都告旅泊頻年和
夢也分明知道莫是相逢無幾依然去了

高陽臺

為阮亭題余氏女子綉高唐神女圖

帝女歸來一天秋色楚峰十二蒼蒼聽說當年曾經薦
枕先王細腰宮裡顏如玉更相尋霧縠霓裳問此時翠
蓋鸞旌誰見悠揚巫山枉斷人腸縱陽臺遺跡未盡
虛茫回首宸游沉淪幽佩堪傷一自侍臣書好夢千載
下雲雨生香又何人剪雨裁雲幻出高唐

沉淪幽佩侍
臣書夢俱見

杜詩

念奴嬌

和漱玉詞同阮亭作

深閨岑寂見朱扉曲曲銅龍雙閉坐覺春陰寒尚峭不
斷氤氲氣遠岫低雲濃花着雨可是伊風味紅箋小
疊此情何處相寄 朝暮鎮是無聊湘娥淚濕空向花

枝倚病裡腰肢慵似柳盡日三眠三起芍藥欄前清和
時候約訴纏綿意眼看春盡那人應是歸未

杜詩湘娥倚暮花上

林人柳三眠三起見西京雜記

長歌

雨窗獨坐百感茫茫因信筆成百字令自歌

且自和之白太傅謂長歌之哀過于慟哭此
語誠然以今觀之不誠然耶

長歌當哭把琅玕擊折珊瑚敲碎悔不當初多弄戟領
取中郎都尉鵲印纍纍蟬冠岌岌忍見人皆醉雕龍何
益算功名偶然遂等閒付與兒曹三旌已矣返我屠

羊肆吳下秋風歸去好飽啖菰羹鱸膾病藉神君巧資
天女無計祛窮鬼夜珠休探怕驪龍未成睡

織女一名
天女見天

官書
注

欽定四庫全書

松桂堂全集
卷四十一

八

又疊前韻

知音寥落任壁間弦絕市中琴碎萬卷詩書何所用不
抵一錢程尉入手杯濃擡頭月艷人好千場醉長卿倦
矣問宦遊幾時遂此去四壁猶存當壚滌器賣酒臨
邛肆春雨綠簑三尺艇釣取霜鱗雪鱠假貸為生送人
作郡怕殺挪揄鬼不如秉燭夜深長伴花睡

三疊前韻

壯心難抑將亂絲斬斷連環挺碎七貴五侯今已矣說

甚粉郎香尉公醒而狂臣饑欲死待覓墻間醉平原何
在自媒終笑毛遂曉來網得霜螯橫行屈強吾力猶
能肆脫白肥黃堪一飽絕勝吳王殘鱸露氣高浮羽聲
慷慨痛飲歌山鬼元龍臥榻肯容餘子鼾睡

四疊前韻

丈夫立意寧蘭摧蕙折壁沉珠碎寶劍摩娑如好女請
試玉門軍尉虎帳論兵龍泉知已卮酒安辭醉沙場百
戰看奇勲一朝遂笑談指顧封侯宛珠隨寶入室紛

成肆行馬歌鐘新賜第狼藉金蠶玉鱸貴客稱觴美人
當夕室瞰高明鬼拂衣歸隱學希夷五龍睡

解語花

題美人卷子

湘裾漏月楚練堆雲別是天然韻石牀小几涼如水一
束桃枝清潤玉冠輕卸乍睡覺心情未穩香枕上隱隱
屏山冷浸芙蓉印 記得那時所認在桂堂東側蘭臺
西近紫薇花下相逢處約略眼重眉褪三秋過也空留

下生綃粉本畫圖中
驀自尋思可有和伊分

玲瓏四犯

却夢調元景病次家兄仲謀韻

美睡初成便有箇人年華猶少
暱枕低幃不怕細君知道
可是陽臺行雨把宋玉魂兒勾到
拚長作玉清仙
隸夜夜掃除庭廟
千金艷質分明是轉腰身向郎迴
抱漸春汗融融綺褥逗破風流竅
幾番着意溫存生不
管儂心不要須央他無賴
汝南雞未曙將人喚覺

玉清仙隸

用夏侯語後段
第七句多一字

再疊前韻

寄語東君莫寵柳驕花誘他年少漏泄春光多在這華
胥道何事孤眠悵底夜夜有彩雲飛到似神君為儂却
病引入上林祠廟睡鄉即是溫柔境有紫玉如烟相
抱剛則是靈犀一點通却心中竅害得文園憔悴那夢
兒偏生還要願生生不作有情癡長得安然睡覺
後段
第七
句多
一字

招夢用前韻

好夢誰同有皓齒丹唇人兒絕少媚寢思香遠勝却邯鄲道一聲砌竹驚迴正月影空牀初到擬欲賦夜來神遇薦枕在朝雲廟纏綿一似春蠶死向雪繭窩中縈抱乍可是雲輕雨薄未透相思竅囑付惜春御史領風月讓伊清要把鶯聲燕語安排莫使幽懽驚覺

再疊前韻

袂節纔過冷落了風流蘭亭逸少單枕無聊心事向誰

行道打疊鴛鴦繡被好招取夢兒來到問何如九疑黛
色帝子下黃陵廟願將身化為胡蝶粉痕死向花心

抱浪說遊仙留玉枕枕內藏機竅望斷美人何處慚愧

殺靈修練要看落花飛絮殢人春睡如眠似覺練要之要去聲

今人作平聲
讀者非也

憶舊游

病酒

病醒扶不起似瑩篴小令促行觴鄉愁供伏枕暮鐘曉

角忒煞淒涼當時幾經被酒錦瑟美人傍記縹色杯輕
密雲香重親手擎將年來漂泊去但醉月迷花是處
堪傷縱文園渴甚甚金仙掌露玉女壺漿欲問盈盈翠
袖風雨暗巫陽誰念我天涯蕭條寂寞年少場

姚嵩傑
酒令憑

關一吐已覺空
喉密雲龍茶名

花犯

梅花和清真韻

傍疎籬橫斜幾樹饒林下風味嫣然一笑早掩却三千

宮中佳麗盈盈仙袂誰同倚自憐翻自喜正雪滿山中
無路素娥寒擁被 幾日小窗試東風為思君長是粉
憔脂悴春愁凝時時有暗香飄墜可惜一枝零落也空
自賦招魂芳徑裡記當日夢中相遇月明天似水凝音倭

宴清都

螢火

四壁秋聲靜疎簾外數點飛來破暝輕沾葉露暗棲花
蕊亂翻銀井有時團扇驚迴又巧坐人衣相映空自抱

熠燿微光願增照金樞景
幾番去傍深林來穿小幔
高低不定隨風欲墮帶雨猶明流輝耿耿隋家宮苑何
在腐草于今無片影向山堂且伴幽人琴書清冷金樞月入
處李義山隋苑詩于今腐草無螢火杜詩忽驚屋裡琴書冷

水龍吟

吳寧周席上作

畫堂春靜鶯花麗珍重為開嘉宴金盤薦處楚酪瓊羞
吳羹雪片曲按檀槽詞翻玉茗歌喉清轉歎經年作客

銷魂此際不覺奈何頻喚
簾幙高張庭院又火樹銀
花開遍促坐藏鈎分曹戲彩杯行無算小器易盈一時
沉頓玉山將斷記醉中上馬明河欲墮橫參初轉

拜星月慢

本意

蓉炷初煎花冠重整小院四垂空碧徙倚風前聽銅蟲
清滴凝眸處試問渡河人去竊藥人歸何日霄路迢遙
抱幽輝終夕
正中庭夜永無行跡更難禁私禱偏羞

湓早是聲喘頻呼吹麝蘭氣息墜金蟲手自梳蟬翼恁
時光莫道窺顏色只影兒裊裊亭亭儘銷魂也得

瑞鶴仙

題袁氏園亭

攜來一片石直壓倒江上三山無色名園堪永日有翠
幹蕭森明玕鮮碧桐陰竹實看聯翩鸚鵡雛接翼問何人
領袖烟霞身是東吳倦客猶憶梁鴻廡下梅福門前
舊曾相識重逢此地同訪瓊花消息待粗酬婚嫁遠尋

禽向五岳安排遊屐記他年行藥歸來龍鱗千尺

瑶花

癸卯七夕

夜波涼薦曉杼聲停正鵲輶催駕經年相見料此時一
刻千金無價明朝何處向雲雨峯頭銷假怕有人天上
含愁碧海青霄今夜西風又報新秋見珠露低垂紅
蘭初謝舊懽如夢多少事記取金釵羅帕離情別思任
填滿銀河難瀉倘佳期果似靈辰拚受星孤月寡

綺羅香

春盡日有寄

翠遠如空黛濃欲滴簾捲青山無數舊事難尋春色總
歸塵土撲蝶會如夢光陰研花箋相思圖譜怪東風不
為吹愁凝眸又見碧雲暮年來淪落已慣任一身長
是飄零吳楚紅淚絨題恨字分明寄與想南樓柳絮飛
時是玉人夜來凭處應望斷遠水歸帆濛濛江上雨

喜遷鶯

偶憶

佳人難得更名士風流傾城顏色候
日衣輕辟寒鈿細打疊受他憐惜
為雨為雲時候非霧非花蹤跡分明
似琪樹交枝瑤禽聯翼當日定情處
纏綿珍重此意千金值世世生生
朝朝暮暮長似為懽今夕回首人間
天上往事依稀堪憶前身是是蓬山
伴侶玉清儔匹

日候

蟲名集宮人衣輒蒙愛幸魏宮人
相語曰不服辟寒鈿那得帝王憐

春從天上来

孫介夫索句題炤贈此篇

年少孫郎算才地風流合讓伊行思清零雨筆挾秋霜
佳句題徧吳閭似方平當日擘麒麟高宴仙鄉奏新詞
有停雲芝蓋隔水松簧更饒大喬國色儼麻姑玉女
臚盼清揚鈿翠輕飛裙波小皺人前微曳霓裳捧流霞
一酌擎來味盡作沙糖儘疎狂任紅塵人世彈指滄桑

歸朝歡

秋夜

畫閣重簾深不捲銅史黃昏催緩箭那堪離別在蘭時
梧桐落盡迴心院夜長君不見漏痕猶比檀痕淺麝煤
殘銀箏寶瑟信手拈來倦側側寒生霜瓦澣眼底屏

山千里遠南來孤雁已先紅一聲天際堪腸斷飄零秋
萬點風條雨葉如相餞最無慘坐愁不寐絳蠟和花剪

陸倕刻漏銘銅史
司刻金徒抱箭

花心動

早秋客思

幾陣西風涼氣滿林下乍收殘暑極目江天蹴雪驚沙
千里迢迢吳楚殷勤謝茱萸灣水為儂好向秦溪去還
恐怕關山重疊雙魚無據冉冉年光欲暮正思歸未
得含情誰語待折疏華寄取一枝又遠隔層城路倚樓
人聽斷腸聲驚秋客到傷心處江南夢一曲瀟瀟暮雨

二郎神

憶富春舊遊

富春七里水拖藍游鱗堪數看來往雲帆淺深沙石渺

渺青谿漁浦南北峯頭登臨遠望不盡斜陽疎樹悵星
子臺空桐君佩冷舊游何處 羈旅又經幾度他鄉寒
暑自芍藥花殘櫻桃夢醒腸斷錦鞋一賦謝客滄洲潘
郎綠鬢心跡猶然朝暮算只有山中明月江上清風如
故前段第二句多一字 往在富春作錦鞋賦頗為彼
中傳誦新安江一名青谿漁浦去富春渚三十里桐
君山在
桐廬境

一萼紅

咏睡鞋

試綰鉤正薰籠初暖百和惹氤氲同夢相偎合歡不解
天然無跡無塵巧占盡春宵樂事問伊家何處最撩人
銷帳低垂蘭燈斜照兒上些跟好是輕盈嬌小只一

彎香浸半捻紅分新月勾雲纖荷舒夜阿誰消受清芬
莫便道魂消此際向玉樓合處更銷魂底事東陽憔悴

化却腰身

向字觀漢宮
有夜舒荷

一寸金

蓮花

水面新粧小著紅綃弄烟霧似艷分霞暈倚欄微笑嬌
含檀粉向人低語獨立愁無侶覓舊日張郎何處乍臨
風一種輕盈玉奴初學凌波步 此夜瑤臺月明香細
翠袖沾清露問玲瓏秋藕幾時絲盡鮮妍蓮子為誰心
苦正隔江欲採盼佳期美人遲暮訴相思有恨無情夢

斷西洲路

西洲用古樂府語陸龜蒙蓮花詩無情有恨何人見

女冠子 第二體

咏美人坐禪

香寮靜也片縷沉檀烟透五雲幢下五絲褥上小結跏
趺玉弓清瘦見展春衫袖袖底分明紅露鞋尖一絳顫
巍巍緗鈎雙疊幾幅湘波壓皺似承密印靈山後問

天然姝麗可是人間有妙容誰偶恰意蕊心燈孤明時
候巾瓶淨無垢正好衣紋不動花陰當晝倩罔明彈指

聲中喚取那人知否

罔明用內典
女子出定事

丹鳳吟

南窗睡覺月色滿床

可是行雲有意故把纖阿一輪推落飛入南窗次第穿
簾度幙霓裳弄影金波堪挹綃帳生寒冰壺初濯遍處
笙竽俱靜香霧空濛冷浸半牀絃索 正值夢迴酒醒
旅中單枕眠乍覺便欲乘風去向瓊樓玉宇細聽仙樂
嫦娥應是笑人長恁寂寞十年前事心兒上憶分明如
昨此時此夜怎許人睡着

纖阿
月御

沁園春

酒後作歌與擎庵

何必規摹五柳之高孤竹之清念久與周旋我寧作我
任教禮法卿自從卿雋乘陪游辛杯侍讌僕病須知非
所能問何者是魚文驥子綸組彫纓 狂來白眼休驚
算若箇堪當一瞬青但紫篝玉炷香消仙蠹朱繩金錯
筆掃讒蠅清酒三杯黃梁半枕不換他年身後名誰驚
覺有墜梧片葉索賦秋聲

又

放眼乾坤曠觀宇宙與爾相期憶登第早年曾同座主

為農今日俱老明時遂我初衣屈卿此憤鄉里安能向
小兒從茲去便濯纓碧漢晞髮清池尚平婚嫁休遲
早覓取三山紺雪姿待尋真嵩華采芝千頃浮家茗雪
載酒千瓶人盡憂生我當樂死笑拍洪厓知未知回頭
處看眩人世界變化參差

眩音幻見
張騫傳

又

自賦歸來為問先生何計忘貧想行吟竹裏烹殘蟹眼
著書林下倚遍龍鱗長着荷裳閑拖芒屨野老柴門正

比隣難孤負是賞心樂事月夕花晨
陶然自得天真
渾忘却春明舊日身有石牀小兒新涼可襲玉池秋水
芳草堪紉時對西風徐揮方麴何物元規塵汚人因傳
語倘扁舟來訪許問迷津

方麴竹
扇也

又

對影銜盃影且前來吾方思之算乘時只合兔園傳冊
成名何用狐穴搜詩世上舉肥宮中磨蝎大藥難將造
物醫安予拙且聽竽南郭植杖東籬
小園清映漣漪

有密竹疎花事事宜更多情綠綺琴心解渴撩人翠嫵
黛色忘飢飽看文君風吹髣髴影此樂誠然不可支誰相
問道茂陵閑散謝客多時

喬子曠作詩喜用僻事號狐
穴詩人兔園冊見五代史

偶興和阮亭

歸去來兮或采金芝或酌清流待乘鳳天邊長風作御
釣鰲海上明月為鈎冠蓋焦螟河山野馬蟻垤縱橫十
二州儘游戲是擊毬建節辟統封侯誰能齷齪相酬
任沉者還沉浮者浮笑空洞容卿是中無物溫柔老我

此外何求一紙彈文三章約法不禁同盟鷺與鷗相親
近且春花秋月夏葛冬裘

又

我所思兮白石清泉複嶂層岡看象外烟霞能令公喜
眼前人物誰得卿狂中聖頻呼索郎屢顧廣大人間出
世方君莫問有增城閭阪漢武秦皇 醉來潑墨淋浪
邀星渚文機作報章歎鐵馬金戈幾番逐鹿博遊挾策
一樣亡羊經卷藥鑪舞衫歌扇天女維摩總道場相期

在便海山兜率誰是吾鄉

海山用白傳故事因阮亭有麗農方丈早認梁鄉句也

題影贈吳中友人

其狀若何珠玉為容冰雪為腸問對朕者誰心知漚露
如卿有幾手淬風霜讀損義文搜奇禹簡探得靈威字
數行低回處歎無情山水閱盡興亡悲歌慷慨蒼涼
正散髮行吟白日長儘家徒四壁貧如司馬目空一世
狂甚袁羊奇服靈均高冠子夏襍佩繽紛茝若香身名
事付杯中醺醺枕畔滄浪

和韻答金嶠庵

往古來今如許英雄鐘鼎旂常盡飄風冷雨餘聲銷滅
寒烟蔓草陳迹蒼茫南顧昆明東瞻閩越二十年来一
戰場到今日喜豐年多黍兵氣銷光溪山老我何傷
且買醉時探肘後囊須我歌若舞烏烏擊缶倡予和汝
款款飛觴僕射不如尚書不顧羯鼓頻催不記行纔傾
倒早一輪紅日湧上扶桑

賀新郎

酌酒與孫默用稼軒韻

笑謂君休矣算人生重茵列鼎為時能幾趁取新涼今
夜好一醉破除萬事儘酒後沾沾自喜賦筆凌雲誰見
賞只子虛烏有公無是更誰薦雄文似休官且臥烟
霞裡又何須虎頭食肉馬肝知味速築糟丘吾將老得
喪由來一理縱狂歌東方月起駒隙光陰河射角歎羊
腸仕路車生耳且引盡黃山子

白苧

春暮

雨乍晴又洗出滿庭葱蒨金鈴風急驚起啄花乳燕裊
柔條斷送了落紅如霰遲日正暄妍颺游絲釵頭輕鬢
撲蝶歸來不覺玉弓酸軟早安排送春小會櫻桃宴
深院密坐相逢低聲問取可是多情荀倩却無語回眸
眼波一線月明人靜待尋歡良夜闌干敲遍金斗放聲
頻多應細駭裙花茜五絲幢下明日酬私願

畫屏秋色

蕪城秋感

野燭蕪城夕送遠目雲水蒼茫不極瓊藥音遙青樓夢
杳玉鉤人寂何處認隋宮見衰草寒烟堆積攢一片傷心
碧聽柳外哀蟬風高響滯如訴興亡舊恨聲聲無力

今昔可勝悽惻莫重問錦帆消息竹西歌吹淮南笙鶴
盡成陳迹轉眼又西風辭巢越燕還如客落葉千重蕭
撼萬事總銷沉唯有清江皓月曾照昔人顏色

淮南笙鶴用高

事駢

小諾臯

維揚旅舍聞蟬

碧蘚庭除綠陰城郭雨過空蒼如洗正疎林兩兩鳴蟬
高低聲遞何待移宮換羽解竹天然相比憂餘音還共
南薰搖曳客去茶清棋殘香細故攪人北窗好夢一覺
揚州驚起歌枕處偏清厲託體高枝翳形密葉直是
如美如沸總不管西候羈情南冠客意似水流光暗逝
漸入深秋天氣轉眼向孤雁寒蛩更替玄髯凋殘白頭

憔悴試臨風獨凭欄干側耳哀吟此際容易使秋心碎

稍遍

春情和東坡韻

拾翠年時踏青節候芳草紛鋪地弄陰晴景色遍園林
屈指到清明天氣小池邊紫燕欲尋新壘紅襟對掠桃
花水正山杏籠烟海棠經雨穠艷天然無比映高樓何
處綠楊枝又搓得鵝黃千尺絲總釀就迷花病酒懷人
幾般滋味素手好同携鬱金屏外朱欄裡欲訴綢繆

鸚鵡生憎忒伶俐看弱不勝衣柔如無骨仙裾怕逐東
風起墨染烏闌袖沾紅唾脉脉春愁無際漸畫燭燒殘
繁英飛墜似綺叢蛺蝶向花低忙不了竊香私意任取
粉銷春老一夢消身世蓬萊水淺滄海塵揚畢竟此情
難已九天鸞鶴倘相招為報人生行樂耳

鶯啼序

夏景

半枕新涼破好夢一聲白鳥遠鐘歇曙色霏微殘鶯啼

上林杪簾幙重重次第捲雲屏曲曲瀟湘曉看露濃香
細茉莉又開多少淺暈纔施薄鈿不御衫子裁纖縞
更青青非霧非烟眉山兩點慵掃倚紗窗梧竹澄鮮弄
薰風悠揚未了正深閨晝永如年問津誰到南園此
日滿地綠陰虧蔽有芳蕖曲沼乍微雨收痕翠蓋孤擎
紅衣雙笑冰井敲殘紋楸彈罷倦聽高柳玄蟬噪覺小
院無人愈清悄簾紋似水琅玕幾度欹眠釵鳳墜盤雲
攪歸來庭戶嬌困難禁綉帶羅裙裊最是溫泉新浴

玉軟花慵侍兒扶起風姿偏好晚涼初薦輕容重換碧
攔干外梳頭處恰團圓明月來相照坐看夜色天階戲
撲流螢輕羅小扇

松桂堂全集卷四十

欽定四庫全書

松桂堂全集卷四十一

吏部侍郎彭孫通撰

南淮集一

癸卯歲除感事

青鬢空嗟去日頻年來萬事總傷神
庭前人去虛題絮天上書沈老負薪
柏葉暫娛分歲客梅花猶隔渡江春
南枝已是垂垂發偏覺東皇雨露新

送尹司理罷官歸樂安

遷客東還不可留，一官清苦志難酬。
十年勞吏雙蓬鬢，千里歸人一葉舟。
津柳若為攀去袂，檣雲已自亂春流。
亦知齊瑟非時好，淥水朱絃黯自愁。

立春日

十年猶著薜蘿衣，矯首風塵與願違。
海外戈船孤戍絕，望中湘楚一烽微。
經春弱柳堪頻折，度磧征鴻更獨飛。
人事飄蓬今已極，祇應沈醉答芳菲。

將赴長安留別上官僉事

芳草江南路辭家屬暮春頻年多作客八口欲依人去
棹經長水離心寄白蘋淒其違故里行矣戀清塵河鳳
聲名舊原鶴意氣真觀風人自理問俗化如神北望君
門遠南瞻使節新恩波殊浩蕩待起轍中鱗

南園二首

三月南園雨復晴輕衣初試踏青行碧桃水暖通人境
綠柳陰濃覆女城春草欲將幽佩結夕陽多傍畫橈明

閒中易有芳時恨花落空林已暗驚

聞唱吳歎早倦聽南園猶作片時停集賢舊苑春將暮

相國東門草自青

南園廣陵王錢元璪池館宋集賢校理蘇舜欽買居之作滄浪亭其上在

吳東門

芳樹斜陽成晚晚孤帆細雨極飄零朝來觸目多

惆悵榆莢花殘已滿庭

春暮遊虞山

春山百疊倚晴空應接峯巒路不窮僧舍半開紅雨外
女牆長在翠微中全吳地盡雲依水平楚天低草颭風

暫得登臨當暇日勝游知復幾時同

送孫介夫歸越州

蘇臺朝極目芳草徧郊原猶作吳宮色能銷越客魂鶯聲移雜樹花氣滿離樽去逐春江水隨潮到里門

雨中春興

風墮薔薇入畫檐一時吹作雨纖纖菜花水淺纔通棹燕子泥香正捲簾陌上有人尋翠羽愁中何處問青帘離居轉覺春陰促晝漏頻移又幾籤

暮春同遽非孔卓勤止登丈星閣遠眺時與勤
止共習參同之學

憑欄忽與白雲齊吳楚青蒼望不迷春去空洲花隱隱
人來故苑草萋萋風濤獨墅聲皆應雷雨諸天勢盡低
早晚遊仙成大藥若為霄路共攀躋

獨墅
湖名

吳下寄百旃

金亭薄暮暫維舟春草茫茫識舊遊廢苑啼鳥終古恨
寒春落日滿城愁疏華不見書南至桃梗還隨水北流

却憶故人猶寂寞琅玕何處一相酬

送陳陶菴民部歸蘭陽

白首東吳客經年始北歸門生開館舍公子戀庭幃雨
急河聲轉川長草色微汴宮春已盡到日亂鶯飛

姑蘇竹枝詞

榆花開盡柳綿飛紅雨初收碧浪肥伍相山前連袂去
二郎祠下弄舟歸

弓腰帖地曲彎彎水鬢拖雲雀色斑翻盡從前巾舞曲

新來齊唱娜如山

畫眉顏色染鮮新
畫眉衫子糝麴塵
吳兒絕愛畫眉鳥
吳娃偏喜畫眉人

紅鴨橋邊鬪鴨城
黃鶯坊裏早鶯聲
寧馨兒是誰家子
薄相由來過一生

千人石上紫雲簫
一曲清歌魂欲銷
勝會中秋纔罷却
便須串月小長橋

空傳崖蜜滑如飴
浪說宮中進荔枝
光福楊梅洞庭橘

吳王當日餉西施

天平翠色列如屏
元墓丹梯萬疊青
兩處山情無限好
遊人只是愛支硎

紅橋書卷至今存
四合紅塵晝欲昏
試聽吳歛君莫訝
此聲元自起閭門

一斗霜鱗一尺形
釣車窄似小蜻蜓
櫓聲一歇鼓聲起
滿市齊聞水氣腥

洞庭山下太湖平
郎住湖中妾住城
不畏石尤高萬丈

郎船日日借風行

贈袁重其

爾名推獨行今日喜相過
委巷留車轍閑庭長薜蘿
白華親膳潔黃鳥友聲多
坐覺春陰暮論交奈晚何

三泉亭

山塘花柳試春遲
吳客停驂正此時
多向三泉亭上飲
無人重理壁間詩

寄題毛華伯西爽齋

空翠結庭戶秋陰生女蘿自饒遺俗韻不媿伐檀歌綠
樹當軒合青山隱几多寄聲三徑客羊仲許相過

題悔菴弔琵琶樂府

一去紅顏帝子家至今哀怨寫琵琶龍沙二月多風雪
吹作明妃塚上花

清詞一奏和人稀冉冉春雲凝不飛紅粉青娥齊掩泣
情知不獨為明妃

和吳梅村詠物詩八首

蓮蓬人

西嶽真人太乙翁靈綃十丈傲秋風
敬容荷鏡持堪照
正則蓉裳製未工翠袖寒生黃裏怨
綠衣人老碧房空
等閒憐子成拋捨露冷香銷八月中

桃核船

度索春秋記未明至今山下一舟橫
問津舊覓秦人種
採實新疑漢使行內殿貯來杯競渡
御筵懷得葉同輕
東園桃梗猶漂泊並載中流有棹聲

橘燈

社橘江邊不可尋，湘人膏火自煎心。
仙枰照去紋如玉，寢帳吹來色似金。
珠裏香殘光隱隱，瓊苞霜冷夜沈沈。
蓬萊九日新傳賜，蓮炬分明出禁林。

蘆筆

筆塚猶堪手自耕，文通五色浪知名。
芟松漸覺身將隱，畫荻空慙學未成。
錦字裁來葭露冷，玉闌銜去雁書橫。
蘆中人已江潭老，封邑寧須羨管城。

繭虎

佳辰又見海榴開
剪艾懸符出異材
疑有山君乘候變
巧從園客化身來
蛾眉已老三眠月
虎氣還騰萬仞臺
聞說繭絲今日盡
使君遮莫是牛哀

茄牛

園中爛漫雨初收
刻畫居然繭角牛
渤海風清堪作佩
吳山月滿漫成愁
當前定啓巴人路
為後應遺霸王羞
柯古徒能搜僻事
不知橫笛夕陽秋

鰲鶴

羽客曾留相鶴書
元裳縞袂未全如
素翎似待凌霄日
清唳疑聞滴露餘
自是神仙原有骨
安知莊惠定非魚
丈軒好託琴高乘
王母筵頭飽玉蔬

蟬猴

山林不記住何方
衣剪蟬綃綴幾行
齊女綏垂供奉服
楚人冠插侍中粧
如從三峽愁巴客
似舞雙丸向越王
度嶺身輕同委蛻
野賓應識舊王郎

別貽上

漁洋山人王十一高卧攤書弄白日朝來送我粵東行
行波麗句新翻出孤舟此去觸炎蒸天北天南思不勝
長千萬里雪千尺日日風濤下廣陵

題孫豹人小影

落日蕭蕭松樹林寒崖幽瀑百重深抱琴獨向此中老
不復人間覓賞心

夏至日小山堂聽歌

細雨連朝散麴塵。小車閒訪宋家鄰。日初北至花陰暖。
風自南來竹吹新。曲句輕清牙作字。玉山窈窕壁為人。
客中怕聽傷心調。莫更低徊感錦茵。

廣陵曉發別孫無言吳爾世六淨上人

煙波七十里。江靜畫帆閑。埜岬生秋水。風吹泊樹灣。
故人一以別。遊子幾時還。向夕勞回首。蕪城落照間。

林外烟生處。人家望欲迷。青蘋繫棹轉。白鳥傍舟低。
獨樹風鳴葉。空江水拍堤。孤帆前路去。秋草正萋萋。

遠道勞相送清樽暫得同孤帆秋嶺外片雨夕陽中細
蒞寒花艷繁枝晚荔紅天南猶萬里何處託征鴻

維揚客舍送雲客兄北上予時亦有南越之行
湖水平堤炎雨歇風吹楊柳擢歌發居人情重遠相送
君向長安我遊越鼓枻中流自此行方舟並渡江浪平
驛燈夜泊雲陽郭戍火朝明鐵甕城廣陵到日停舟處
南北迢迢各異路代馬還嘶塞北烟越禽自託天南樹
只今已見鯨鯢戮薄海銷兵佩黃犢時清豈合樂邱園

親老還須營斗祿日下翱翔多故人紛紛先據要路津
致身遲速各有會莫以外吏傷沉淪酌君卮酒君努力
前路悠悠漫成憶庾勝山頭少雁飛燕昭臺上空秋色
驪駒催發不可留後會須經春復秋兄弟相思五千里
江湖此去一孤舟

鑿江舟中再別孫無言吳爾世

真州城南八槳船船中酌酒更擊鮮夜闌酒盡慘不樂
江水無聲江月圓故交念我遠遊苦執手蟬聯語無數

五更月落星漸稀舟人四起撾津鼓嶺南嶺北天一涯
鳴橈欲發猶遲遲川塗萬里別經歲縱有相思那得知

送翟靜生之任汝南

看君此去佐名藩法吏于今世所尊路轉雲林飛翠幃
山連秋樹引朱輜訟庭人靜閒花落官閣詩成小篆溫
見說汝南名士在不知曾滿翟公門

登燕子磯

危磯獨立思蒼茫紅蓼洲前草自芳雲臥岩扉初月上

烟生江浦一川長
新亭高晏風流盡
舊內清秋水調涼
莫問南朝惆悵事
江潮東下石城荒

發真州

星盡夜色蒼
清波浩無底
北風生早涼
孤帆向南指
川明戍火微
舟觸漁罾起
前路及清秋
離情滿江渚
葉落猶在林
萍生不離水
胡為遠遊人
戚戚去鄉里

公子洲

萬里依人嶺外遊
布帆今日發真州
江南江北相思處

公子洲前碧杜秋

金陵懷古

舊苑無人草樹秋六朝遺蹟已荒邱地連東楚山無際
城對清淮水自流幾見急裝邀隊主時開霸府領揚州
彥回少日仍名士千載猶然怨石頭

繁華空說帝王家輦路今來急暮笳淚盡金城前度柳
歌殘玉樹後庭花新林浦口秋移艇石子岡頭晚噪鴉
風景依然堪記憶承平猶數舊元嘉

日下何人肯息機，輕塵曉露事全非。
苑牆雪暗鐘初斷，山館秋涼葉盡飛。
江上青龍千騎擁，桁邊朱雀八騶歸。
可憐年少青雲器，不及丹徒老布衣。

當時五馬渡江遊，妙選良家入帝州。
夜月幾經芳樂苑，曉鐘長罷景陽樓。
新宮已見營諸鬼，內殿惟聞賽蔣侯。
咫尺維揚方鎮重，使人千載惜袁劉。

杜宇聲殘百感生，西風建業舊神京。
詩成狎客遺簪會，酒泛諸郎按曲聲。
江外羽書空絡繹，禁中刀敕正縱橫。

大官別有長生藥不假天台刺史行

萬里山陵萬古愁南司北部正悠悠屠沽自立宮中市
竈養爭除闕內侯肯向人間求故劍誰從闕下問金鳩
姑谿幕府空貔虎一夕龍車不可留

針魚村

犀渚前途近魚村早市空南來經幾日愁絕石尤風

送吳爾世奉母歸新安次孫山人韻

溪南幽絕地君奉板輿行已自甘偕隱能無念友生江

芳清可採山翠近如迎想到稱觴候千花照酒明

烏江渡

艤舟近沙岸西風吹野戍傳是舊烏江項王曾此駐夜
驚垓下歌曉失陰陵路氣盡耻見憐臨江不肯渡誠哉
烈丈夫天亡乃非誤荒祠降神鴉濁浪吞津樹至今二
千年江流有餘怒

夜泊采石

滄洲夜色碧泠泠楚火依微落遠汀江艇秋生名士詠

寒山月滿謫仙亭長留勝跡來憑弔忽有幽思動杳冥
吟望翠屏空不見渚蘋何處酌芳馨

梁山

理櫂方西上秋風柰爾何江隣牛渚近山入故鄣多村
徑依沙轉漁榔絕水過行持三尺艇歸去狎滄波

板子磯

荒磯相對出盡日有風波綠水流年促青山舊壘多故
侯誰復問行客幾經過何事臨江戍東南久荷戈

蕪湖曉發

清江新霽後一棹去夷猶雲木蕪湖曉風帆荻港秋舟
輕爭過烏山狹束懸流閑對同行客相依說舊遊

江月

川上浩烟波風前起棹歌暮潮初落處江靜月明多涼
氣生秋露殘星墮曉河故園當此夕相憶復如何

池口別友人

暝色垂垂合殘霞水上明帆低秋浦口人別暮江情半

夜潮初上千峯雨欲生客愁緣更極百感迴難平

潯陽江口作

鱖魚村對潯江下伐荻為門竹為瓦清江無主終古流
處處江魚隨意打賣魚歸去日未中呼兒作黍餉阿翁
江鄉六月薦新穀破釜炊出桃花紅

陶涇

日暮帆初落孤村且自依歸人乘月渡夜火隔江微獨
鳥暝投樹寒漁水滿磯經秋猶幾日擗葉已紛飛

小孤山

孤峯立水中迢迢四無際樹色碧如簪山形小于髻上
有靈祠鑠綠蘿美人獨坐掩修蛾不知為雨定何處烟
滿空江水始波

早秋即事

蒹葭初滿岸遠水沒空洲白日頻西下滄江自北流炎
雲不作雨楚樹易為秋時見行人影青青古渡頭

登湖口縣城

卷四十一
一望烟波萬頃明
女垣高與石根平
湖光盡日依樓堞
山色終朝滿縣城
寒嶺無人孤鳥下
秋林欲雨數蟬鳴
何當便作移家計
終臥滄洲寄此生

江上寄友

涼氣生蘋芷
夕陽波上遲
水中漁結屋
樹杪葉辭枝
失路驚搖落
當秋怨別離
歸程君莫問
迢遞隔年期

石鐘山

日落湖陰三百里
天低秋色萬千峯
輕舟好下宮亭口

夜臥深潭聽石鐘

湖口

倚棹愁看日又曛
鑪峯天外落氤氲
江連九派潮爭上
地接三湘路始分
水色平侵岩際樹
石龕高對嶺頭雲
孤舟莫近楓根泊
木葉聲多不可聞

南康夜泊

塔影掛星渚
寥寥烟外鐘
驟涼知夜雨
繁響入秋蛩
霜露行將及
關河悵所從
謝公精舍近
相隔幾雲峯

進彭蠡口見鄰舟挂帆入楚

淪落天涯可柰何
又看清露滿林柯
書裁繡段愁難寄
地險橫池喜乍過
皖口西來江路盡
涇城南上楚程多
因風想到懷沙處
秋水瀟湘已自波

彭蠡湖中望匡廬山

秋色晚澄鮮
湖中水初漲
流波夕吹生
落日孤帆漾
面見匡廬亭
亭霄漢上
風泉暗崖谷
紫翠羅屏障
雲雨生其中
吞吐勢俱壯
聞有神仙宅
靈閔世無兩
水簾秋

自捲花梵寒逾放瑶草閱千春琪枝非一狀往往逃名人于茲謝塵鞅谷飲含清腴林琴發幽暢夙耽世外期泉石存微尚烟蘿不可攀相望增惆悵

秋日登滕王閣

客路逢秋思易傷江天烟景正蒼涼依然極浦生秋水終古寒潮送夕陽高士幾回亭草綠梅仙一去水雲荒臨風不見南來雁書札何由達豫章

南昌晤熊雪堂侍郎詢及先叔父太僕公遺事

感賦

蓼花洲畔解征輪
班草相看意倍真
隔水秋陰遙入座
連江暮雨欲沾巾
故人猶抱西州痛
舊業誰憐北叟貧
海內幾人邀顧盼
餘波應為及枯鱗

峽江道上七夕

十年蹤跡總茫茫
每到佳辰憶故鄉
玉峽晴帆低驛路
白沙秋水浸寒塘
清川已自迷歸棹
錦杼何由得報章
此夜閨中多罷織
定陳瓜果祝蕭郎

估客曲

何處千金賈方舟
共水津傍撓莫相問
俱是未歸人

花石潭

孤月在林杪
哀蟬猶亂鳴
暮雲澹無色
依約一川平
尋烟遠自泊
汲石秋逾清
徙倚江潭上
行吟空復情

雨泊章江門外與蘧非對飲

何事相看各黯然
故鄉一別動經年
章江門外聽殘漏
寒雨孤舟客未眠

吉州秋感

短棹沿洄上水遲，螺川亭下草離離。
灘聲傍枕寒逾急，漁火依沙遠更移。
秋雨涼生將盡夜，暝鐘愁聽欲殘時。
居人歎息徵遺事，淚滿當年峴首碑。

建牙吹角贛江濱，二十年来迹未湮。
父老猶然思往事，聲名已自媿先人。
孤蓬寒雨鳴林葉，極浦秋陰散渚蘋。
此日經過無限恨，臨風空有淚盈巾。

中元日

日夕雲洲上溪聲入聽遙異鄉頻過節秋雨每連朝江
轉楓杉暗山寒草樹凋愁心南望切嶺路尚迢迢

藍村遲尹孝廉船不至

秋水何清駛潮生八月中江橋全臥雨石浪不因風之
子空相待心期孰與同暮天遙極目杳杳沒南鴻

西江道中雜詠

涼雨過天末蘋風嫋嫋生行人乘月色相向浴江清石
古猶含態山多不記名空濛雲水外時有棹歌聲

山驛荒無次，清鉦響易終。
聲殘人更起，寒雨夜推蓬。
暗燭孤花冷，新涼一幌通。
羈心已搖落，況是急秋蟲。

倚揖中流望，千山擁一溪。
幾家茅屋在，同住石橋西。
子夜江潮長，孤峯樹影低。
昨來行徑沒，何處辨樵蹊。

何事南安路，崎嶇不可從。
披榛迷故道，伐木失前峯。
谷暗聞猿嘯，林幽避虎蹤。
東風一相借，目斷嶺雲封。

野泊萬山裏，荒荒不記程。
片雲當夜捲，孤月映沙明。
早稻初堪飯，秋瓜已可羹。
他時深記取，辛苦越中行。

逍遙章水上極望楚山頭
落葉孤楓樹西風一釣舟
還思富春渚島嶼正清秋
枉棹何時過重尋謝客遊

沓嶂生迴溜驚湍瀉白波
水如三峽出灘入五雲多急
浪緣崖轉危檣戴石過臨深
曾有誠寧必涉江河
野色寒彌曠林光遠自微
潭烟迴合處江莢佳人稀返
景連波翠帆帶雨飛沙禽知
客意相對亦忘機

艤舟吉安城下聽父老說金王之亂感賦此詩
寄胡三山司理

鷓鴣峯下暫停船
父老淒涼話昔年
征稅多時空澤國
亂離幾處有人煙
江城日暮吹磷火
潁水秋來沒渚田
休息于今猶未起
深知公府借才賢

潭口

萬里虔州路南來
又幾重夜寒殘夢覺
隔水聽晨鐘

虔州僧院逢姚江故人邵貞木

旅泊江城信所如
禪扉虛掩夕陽餘
故人幾日虔州住
漫爾相逢靜者居
合院松陰秋磬歇
隔林樟葉午風疎

君歸定取由拳道為致天南一紙書

泊小溪驛前

桂楫此江濱
千山暮色新
飛泉臨澗道
行徑入荆榛
沙月虛生白
溪魚清畏人
煩襟聊一濯
已覺淡無塵

夜宿上猶江口

洲渚增波夕
吹生寒光上
水漾虛明夢
中秦逕家何處
枕底章江夜
有聲流火將
殘秋在樹
曉河欲墮月當城
最憐客鬢如蒲柳
清露枝頭已自盈

次芙蓉渡

東風不為送灘舟
百里川塗信宿留
臨水早驚千葉下
隔河時見數星流
清江渺渺芙蓉渡
白露泠泠桂子秋
夜擁吳綿聽寒溜
不知身已近炎州

見涉江者

秋匏映微明
川光遠相接
林靜不聞聲
歸人踏落葉
渡口立踟躕
水寒不可涉

入虔南界次瓦角潭

當暑辭家萬里征，扁舟兩見月華生。
客程已去吳中遠，秋氣多從雨後清。
曉露欲沈星歷歷，明河相望水盈盈。
家人豈謂猶飄泊，只說南行到粵城。

南安送程五舍人入都兼寄王十一司理

詞客趨朝萬里途，夕陽行色亂平蕪。
近南已覺猿聲苦，向北初看雁影孤。
落葉秋燈明驛舍，片帆寒雨下江湖。
竹西傲吏猶高臥，君到應知病欲蘇。

飛來寺

秋雲川上暝峽樹雨中微草聽清猿叫行人淚滿衣

大庾嶺上寄周量

秋嶺峒堯天一隅南來鳥道極荒蕪稻花再熟香初遍
竹箭叢生翠不枯自有關門通越徼依然風土入吳都
憑高北望扁舟客此日輕帆下鬱孤

游篁村入芥菴謁昱禪師

欲買深山計未能虛名十載總無憑入林且訪經行室
浪跡真如自恣僧花院風微生夕磬雲峯葉落見秋燈

此身但得辭塵累洗鉢焚香亦自應

九日寶安江上同尹考功兄弟泛舟賞菊即席

留別

九日移舟傍水涯烏衣白恰向風斜江雲一碧波同色
籬樹初黃菊有花彭硎晴陰邀夕照石橋秋漲汎明霞
歸撓正值寒潮落新月依稀印晚沙

席上花枝壓帽簷林中霜氣正清嚴一行綠樹催移棹
四座青山入捲簾盡瀉金樽狂畢卓平霑玉柱惱江淹

追遊縱有他時約未必風流此會兼

泛舟歸與諸子亭中玩月再疊前韻

逸興清秋未有涯倚闌相對月初斜樽前競秀三珠樹
筆底紛飛五色花滿篋高文翻白雪千山爽氣合青霞
明朝可惜江亭別細雨平颿下淺沙

空庭燈火逗虛簷鈴杳聲寒入夜嚴星轉明河低照戶
月移秋樹暗窺簾朱華泣露芳初歇綠蕙披池水半淹
欲託清歌思無極應劉才調好誰兼

再遊芥菴

蘭若蕭條絕四鄰，乘閒且復往還頻。
林光盡日能娛客，山徑重來不問人。
翠竹黃花含妙偈，閑雲流水悟前塵。
宿緣彷彿堪追憶，三十年前未了因。

宿芥菴呈昱禪師

雲山偶作南中客，杖笠初尋物外遊。
滿院寒香仙桂發，一林疎雨玉梧秋。
已知世味同芻狗，便息機心近海鷗。
願乞巾緡為弟子，他年追侍碧峯頭。

雲水襟情久自同。繩牀玉麈見宗風。秋生夕籟高林外。
人在山堂細雨中心境。自憐空未得思惟。已覺路將窮。
重來證取無生意。相約明年荔子紅。

奉酬昱禪師見貽之作

竹院無人諸境寂。翛然已自出塵遊。瘴雲近海孤村暮。
寒雨生潮片葉秋。信宿微言還得象。行吟心事欲盟鷗。
春前趣取芒屨健。直向羅浮最上頭。

何肉周妻累不同。幾時林下暢元風。諸天說法花時現。

片語當機日可中
白社但能傳慧業
青衫誰復怨文窮
塵緣未了空歸去
惆悵篁溪夕照紅

送王震生之惠州

江亭微雨過木葉淨高枝
秋入重陽後人當欲別時
波光天外動峯影棹中移
歎息南飛雁冥冥不可期

張穆水墨翎毛歌

小鳥天生好毛羽
翩翾長傍庭中樹
只應終日搶榆枋
何得翻然上豪素
畫家名手不易逢
著筆用意各不同

寫生貴有生動趣比似山水尤難工張穆晚年最入妙
點染翎毛皆逼肖風吹倦翼矯欲鳴日射高枝猶振掉
春陽遲遲花氣新黃鸝翠鵲飛向人清秋堂上圖一展
霜眸下瞰低晴旻昔有林良與呂紀擅此巧藝稱絕神
墨描彩繪俱有態後來居上更軼倫山人家在東山下
六十無兒一茅舍片石當庭香草繁白頭意思亦瀟灑
貧難得食且莫憂孤高自合相知寡此藝足成身後名
傲殺悠悠肉食者

酬周蕢九日登梅山見貽

重陽無雨試登山把酒論詩盡日閒
一水直通清淺外三山長在有無間
疎林霜葢當秋發遠浦風帆趁月還
興至便携筇竹去夜深猶得款松關

九月桃花

穠艷惟應占早春一枝偏發授衣辰
誰傾籬下忘憂物恰遇源中避世人
繁塢秋深吹絳雪寒林霜冷坼紅鱗
欲攀芳樹愁搖落憔悴劉郎舊日身

題周黃墨竹

故園新種千竿竹，秋雨應添綠萬叢。
昨夜山樓寒夢覺，依稀身在碧鮮中。

尹孝廉席上贈伎

月落參斜酒半醺，夜來何處賦行雲。
東鄰才子前身玉，北里姬人小字文。
翡翠鬟低無片語，麝蘭烟盡有餘熏。
閒情近已銷如水，深媿花前簇蝶裙。

贈夏繼先

五載相思意渺然，嶺雲江樹隔山川。
鸛裘憶醉燕臺酒，鵲印看清瘴海烟。
萬里同時依絳帳，一官幾日領樓船。
五仙城下秋風裏，再得班荆說往年。

別尹二孝廉

園林清絕敞高秋，樽酒時時話昔遊。
楚澤花殘留雜佩，越江波暖有歸舟。
故人東道情何厚，遠客南金意未酬。
日暮不堪津渡急，碧雲紅樹迴生愁。

鄉人王謝從粵西過羊城述彼中風土甚悉因

作此寄吳念克吳時在桂林

有客遠自粵西來形容枯槁面深黑入門問客何所苦
客言粵西居不得迴溪複嶺千萬重瘴癘時時見侵逼
五日一作墟與市十日一得酒與食硯人蜚子錯雜遊
欲說中懷少知識桂林司理近何似手板事人仰鼻息
一從蠻府賦娵隅終歲南方飽蜜啣食蛙休復問官私
服薏猶能美顏色二始因頓顏延之三年勞苦吳念克
文情遼落慕思枯為爾相思更相憶安能白首久遐荒

早向青冥排羽翼

秋夜醉尹考功宅戲贈歌童燕郎

九月芳柑血色紅
臨筵一擲意先通
蓬萊殿裏依稀是
玉盃親傳女侍中

銀粉金枰清絕塵
手分朱實色鮮新
儂心已自慵騰久
何必擯榔始醉人

半幅紅箋裏東新
合歡仙果嶺頭春
木桃不是尋常物
那得瓊瑤報美人

小史風流獨擅場珠兒真覺勝珠娘甕頭吏部疎狂甚
不管人間有斷腸

浴日亭

翠壁黃灣曙色浮若華已自涌驚流誰能不憶錢塘路
萬頃銀濤一派秋

東坡詩坐看暘谷浮金
暈遙想錢塘涌雪山

移寓新街宅簡東鄰胡先輩

吾愛東鄰老家貧好著書望衡知比舍卜宅更移居賭
墅春澆酒論文夜剪蔬襟期殊不俗來往莫教疏

送馬秀才遊梧州

桂水深深渡客遲
蒼梧西去欲何之
不知懷刺依人日
得似垂簾讀易時



松桂堂全集卷四十一